



*Selasa, 03 Nopember 2020*  
**Ogen: Jeremia 36 : 11-26**



Penjayamen Tuhan Man Si Erberita



**K**ai pe sinibahan manusia i bas geluhna ndatken ulih, ulih si banci mereken kiniulin ntah pe si la mehuli man dirina bagepe kalak sideban. Si enda tergantung kuga kalak sideban ngidah ras ngenilaisa. Terlepas kubas penilen kalak sideban, sipenting man banta singelakokenca, rukur maka kai sibahan kita e kerina i bas sura-sura si mehuli. Alu bage semangat ras la biar-biaren kita ibas ngelakoken kai pe.

Kegeluhena Jeremia si idilo ras isuruh Dibata, la menukah ndalanisa, sabab kai si isehkenna erbahan nembah ate kalak, aminna si mehuli ras erguna kal si isehkenna. Pemimpin ras sebagian kalak Israel tetap ndalanken si la payo, la adil ras la bujur, ibas kai siilakokenna e reh Kata Dibata arah Jeremia, si erbahan nembah ate kalak seh pe ia ipenjaraken. Renungenta nuriken maka Kata Dibata si isehken Jeremia enggo isuratken. Baruh nuratken kai si ikataken Jeremia emaka banci iogekenna man sebagian pemimpin Israel i bas istana kerajaan. Kenca megisina emaka mbiar kerina pemimpin e. Ipersingetina maka arus cebuni Baruh ras Jeremia, ku ingan si la isepe ngetehsa. Payo, merawa raja, itutungna gulungen kitab e amin lit si mindo gelah la itutung. Kenca e isuruhna nangkap Jeremia ras sekretarisna. Tapi Dibata njayam ia, alu munikenca seh maka la banci itangkap.

Lit paksa kita arus ngalaken tantangan tapi lit ka paksana nilahi tantangan, arus cebuni, labo ban mbiar tapi melala denga si banci ilakoken. Ula min kerigegheh si lit guna ndungi ras ngalaken tantangan e. Bageme bas kegeluhenta, pentar min kita ngidah ras ngalaken situasi janah perlu si inget maka Dibata tetap campur tangan i bas kegeluhena suruh-suruhenna. Labo ibereNa sura-sura si jahat i bas mbatasi kuasaNa. Gejab lit tan Dibata si njayam kita amin la si idah caraNa erdahin.